

zuzendariari

(0034) 943 300 222

OHARRA: Ahalik eta iritzi gehienek izan dezaten tokia, ez da komeni makinazko 15 lerro baino luzeago idaztea gutun hauetan. Idatzi duenaren izena, telefonoa, helbidea eta NAren zenbakia agertu beharko dira. Laburtu behar izanez gero, zuzendaritzak bere esku du horretarako eskubidea. Erdaraz iristen diren gutunak ez dira argitaratuko.



zuzendariari@egunkaria.com



Martin Ugalde kultur parkea 20140 Andoain

Iruñeko Udala eta euskara ikasteko diru laguntza

Elvira Agirre, Mariaje Perez eta Izaskun Ruiz de Laramendi • IRUÑEA

Azken egun hauetan prentsan agertu da Iruñeko Udalak uko egin diola euskara ikasteko barnetegira joateko diru laguntza emateari.

Osoz 26 lagunei eragin die erabaki horrek, horien artean artikulu hau sinatzen dugunoi. Gure eskaerari muzin egin, eta azalpenik eman gabe azken hamabost urte hauetan emandako diru laguntza bertan behera utzi dute agintariek.

Guztiok dakigunez, barnetegi batera joateak, ahalegin pertsonala ez ezik,

esfortzu ekonomikoa ere ekartzen du (bai guri, bai hara joaten diren ia guztiei). Zoritxarrez, eta eguneroko ogi bihurtzen ari da jada, euskarari lotuta dagoen oro bultzatu beharrean, trabatu eta orain arte eskubideak zirenak murrizten dizkigute.

Are gehiago, gure eskaerak erantzunik ez zuela ikusita, nork bere kasa Iruñeko Udaleko Kultura Sailera jo genuen, non gure eskaerari muzin egin, eta arduragabekeria izan zen nagusi: aurten ez zegoe la horrelako diru laguntzarik, eta kito, nahi izanez gero gure protesta hedabideen bidez zuzentzea genuela bide bakarra; Iñaki Azkona Kultura Teknikariaren hitzetan.

Eta horrela egin dugu, jakina, udal erregistroan ere kexa ezarri ondoren.

Geure buruari haxe galdetzen diogu: zergatik ez zuen ezta protesta ere egin, gutxienez, guk egiten dugun bezala? Ongi baitakigu Kultura Sailak ez ziela zinegotzietan horren berri eman. Horregatik haiek ezin izan zuten gai honen inguruko galderak egin aurreko abendua arte, udalbatzar batean, Kultura Sailera zuzendutako deiak ugaltzen hasi zirenean, hain zuzen ere.


Zer gehiago esan genezake Iruñeko Udalak hartu duen erabaki horren gainean? Triste deritzogula, horrelakoekin ohituak bagara ere, ordezkatzeko duen herriaren hizkuntza eta kultura etsaiarekin nahasten dituen Udal Gobernu honen aldetik.

Kultura Saileko zein Iruñeko Udaleko arduradunei hau esan nahi diegu: gure


eskaerari erantzuteko exijitzen dizuegu, alde zein aurka izan, erantzuna merezi dugulako; aldi berean, hamabost urtean lehenengo aldiz diru laguntzarik zergatik ez duten eman argibideak eskatzen ditugu; laguntza moduan ematen ziren 9.000 euroak non dauden azaltzeko ere eskatzen dugu —laguntzaren helburuak guk aurkeztu genuen dokumentazioan zehazten dira, Etayo jaunak eskatu bezala—; eta, azkenik, Udal Gobernu honek diru laguntza ematen jarraitzeko exijitzen dizuegu, iruindar hiritarrok ditugun bi hizkuntza ofizialetako bat ikasi eta normalizatzeko beharrezkoa baita. Hurbil, oso hurbil gainera, dauden hauteskundeetan bozkatuko duten iruindarrak gara.

Gure eskubidea da.

montxo



galdeiozu... ?



JOSU EGIREUN

Hemen eta Munduan taldeko kidea

Gerra hotsak entzuten dira asteotan; isildu al ditzakegu?

Izaskun Bengoa (Gasteiz)

Gerra hotsak benetakoak dira; Bushen estrategia ez da erokeria, baizik eta kapitalismo neoliberalaren potentzia nagusiaren *hil edo biziko* apustua. 400 bilioi dolar eta 150.000 soldadu ez dira jartzen Iraken kontra mehatxu egiteko besterik gabe; haien ondorio bakarra, NBERen onepena izan ala ez, munduaren eta gizakion suntsipena besterik ez da. XXI. mende hasieran, gerra hori *hil edo biziko* gertaera suertatu da munduko gizaki ororentzat, eta horrek astindu ditu azken hilabeteotan mundu zabalean inoiz, inon, gerra bat hasi aurretik izan diren mobilizazio garrantzitsuenak. Baina egindakoa ez da nahikoa. Hilaren 15ean dugu hurrengo hitzordua mundu osan. Hurrengo, ez azkena.

Otsailaren 11tik aurrera **Nagore Aranburu • aktorea** izango da Galdeiozu ataleko gonbidatua. Bidali zure galderak ordurako. galdeiozu@egunkaria.com

hirusta



Jon Benito

Fuel orbanak

Ez gaitu ahanzturaren zurrunbiloak itoko, ez zaizkigu zauriak osatu. Izan zen Normandia-koa bezalako inbasio bat Donostian. Ez naiz 36an, gerra garaian, kostaldea inguratu zuen Cerveraz ari. Mendeak urrutiratu du Alfontso XIII.aren itsasontziak Kontxako badian hondarra jo zueneko, historia inperialak ez ditu umiliazioak deskribatzen. Orain, bestelako inbasio beltzago bat dago bertan. Lehen, gailera formako zerak, orban zabalak dira orain. Harkaitzetan itsatsita, harearekin nahastuta. Bi mila tona galipot jaso zituzten herenegun kostaldean. Zarautzen eta Ibarrangelun belztu egin omen ziren arroak. Bazen kezkarik, Armintzan, Saurraranen, Bidarten, labarretako egoera zela eta. Bada lurraldetasun bat, elkarlan bat aldarrikatzeko garaia; Kostaldetasun bat nahi bada. Bretoiak, galegoak, euskaldunak. Gaitarik jotzen jakin gabe, *morriña*-rik sentitu gabe, galiziarren pare gara beste behin. Koordinada beretan, korrante eta haize be-

ren menpe, ezintasun berak kutsatuta, inbidiarik gabe. Historia inperialak ez daki itsasoa memoria dela. Itsasoak, desagertutako pertsonak itzultzen dituela, begiak janda, barrenak puztuta. Itsasoak barrenetako zaborrak dakartzala edo ozeanoaren beste aldetik idatzitako mezuak. Oraindik, udan, Getarian itsasoak behera egiten duenean, XVII. mendean hondoratutako barku bat ikusten da San Antondik gertu. Barku horrek Ameriketan esklaboak lotzeko brontzeko argoilak zeramatzala dio legendak. Horregatik ez zaigu ahazten ez garelako aske oraindik, besteen jarrenen, erabakien menpeko garelako. Itsasoa memoria dela esan dizut. Ez dakite itsasoak ez dituela akatsak, porrotak eta utzikeriak estaltzen. Ez dakite hau ez dela hasiera besterik, ez dakite azaletik barrurantz badirela orban gehiago, nahiz eta normaltasun jarrera bat aurkeztu. Olagarro izutu asko dago gerra aurreko egun hauetan. Galdetu bestela nork itzuliko dion errugabetasuna Apostolos Mangourasi.